

Gobernador a firma pa presupuesto 2015 bay parlamento

ORANJESTAD — Ayera, un dia mas laat cu anticipa, gobernador Fredis Refunjol a pone su firma riba e 'aanbiedingsbrief' di gobierno di Aruba pa loke ta e presupuesto di 2015. Minister di Finanza Angel Bermudez ta confirma na Bon Dia Aruba cu pa medio di esaki e presupuesto ta cla pa wordo manda pa parlamento.

Diamars dia 17 e presupuesto a wordo ofresi na gobernador Refunjol. E firma a wordo poni dia 19, pero un dia mas laat pa motibo cu antayera dia despues di Dia di Himno y Bandera - tabata un ATV-dag pa trahadonan di gobierno. Segun e mandatario esaki a trece cu ne cu tur e proceduranan a keda pega y a core retraso. Pa motibo ey e director nobo di Gabinete di Gobernador, Rayan Budhu Lall, a tuma contacto cu minister Bermudez antayera pa bis'e cu lo firma e dia despues den oranan di mainta. "11'or y mey el a yama mi pa bisa cu tur cos a wordo firma y cu lo prepara e documentonan pa trece nan cerca mi", asina minister Bermudez a confirma ayera tardi na Bon Dia Aruba. Tumando cuenta cu parlamento mester haya e presupuesto den man, preguntanan lo mester wordo formula y tambe e periodo di Paasvakantie, minister Bermudez ta anticipa cu tratamiento lo mester por tuma lugá den di dos siman di april.

Deficit birando menos

Segun e mandatario, presupuesto 2015 ta atene su mes un biaha mas na e regla di

e cap di 1,35 biyon florin. Tekort den e presupuesto ta 3,8 por ciento. "Esey ta hopi mas abou cu e 9 por ciento di año pasa", segun Bermudez. E lópende rekening tin un saldo negativo di 25 miyon florin. Esaki pa motibo di un gasto di interes di 200 miyon florin. Tumando cuenta cu un deficit di 123 miyon y prestamonan cu ta caduca na un suma di 183 miyon lo bay mester refinancia pa un suma di alrededor di 306 miyon florin. "Y esey ta hopi menos cu un año pasa", segun Bermudez. "Asina nos por yega na un surplus na 2017 pa 2018 cu cual por paga bo debenan."

Gastonan di personal

Pa loke ta reduccion di gastonan di gobierno lo sigui cu e maneho di no tuma hende extra unbes cu trahado ta bay cu pensioen of ta termina cu su empleo di un of otro forma. "Cft a conseha nos pa kita lo mas posibel e automatismonan for di e gastonan di personal, y nos ta haciendo esaki", segun Bermudez. E personeelstop ta keda vigente, cu excepcion pa cierto puestonan pa cua ta rekeri un persona cu nivel di HBO of academico. Pa loke ta indexering a regla esaki te cu 2017 caba, pero e año aki kier bay wak hunto cu e partnernan social cua di e duurttoeslagen mester keda wordo hisa y cua no.

Contra Impuesto di Solidaridad y hisamento di bbo

Dos di e consehonan cu Cft a duna na fin di december tabata pa introduci un asina

yama Impuesto di Solidaridad y hisa e impuesto indirecto di bbo pa tres of cuater por ciento. Bermudez a dicidi pa no adheri na e consehonan aki pa cu presupuesto di 2015. "Motibo ta simplemente pasobra nos departamento di impuesto di baina por hala rosea cu e cantidad di impuesto atrasa cu tin cu cobra ainda. Lo ta di mas pa pidi di SIAD aworaki pa aplica efectivamente un impuesto nobo di solidaridad of un hisamento di bbo", segun e mandatario. E retraso grandi aki segun Bermudez ta resultado di diferente factor, entre nan e mal customber cu ta reina den pueblo pa no paga, pero tambe mismanagement den SIAD mes y di parti di gobiernonan anterior, manifestando nan mes entre otro den introduccion di programanan di software cu no a resulta bon pa e procesacion di impuesto. Pa fin di año

minister Bermudez ta spera cu SIAD lo 'haal in' gran parti di e retraso aki.

Haci uzo di experticio di Cft

Sinembargo, segun Bermudez, den presupuesto si a adheri na diferente otro consehonan di Cft. Un di nan siendo mehoracion di impuesto y aduana y tambe e trahamento di un presupuesto pa 2016 y 2017 cu lo mester cuminsa wordo hinca den otro unbes cu esun di 2015 keda formalisa. "Esey lo duna mas tranquilidad pa gobierno enfoca riba otro terenonan di maneho", segun minister Bermudez. E mandatario ta bisa cu su meta ta pa keda cla cu esaki na september. Tambe a cumpli cu Cft su peticion pa duna un roadmap pa loke ta e 24 'ahustacionnan' cu gobierno a anuncia. Sinembargo, minister Bermudez ta keda para riba mantencion di

un rol pa Cft como consehero y no como parti integral di maneho manera ta e caso na Corsou y St. Maarten y manera Hulanda aparentemente ainda kier propone. "Ami no tin niun problema cu haci uzo di nan experticio, basta cu e prijs politico ta keda pagabel. Ami mes no ta politico, pero mi ta bisa esaki paso mi mester tuma cuenta cu mi coleganan cu si ta." E idea di supervision riba su mes no ta straño, segun Bermudez, cu ta muestra riba con paisnan Europeo a practicamente pone parti di nan maneho den man di Bruselas. Di otro banda Bermudez ta muestra riba declaracionnan di e propio Cft den prensa unda ta bisa cu awo nan ta realisa cu cada isla riba nan mes tin nan tempo y dinamica financiero cu mester tene cuenta cu ne. "Y esey ta conta pa Aruba tambe", segun minister Bermudez. □

